

Edizioni

- letto 833 volte

Pattison

I.

Si de trobar agues melhor razo
que ieu non ai, sapchatz que me plairia;
mas tal com l'ai farai gaya chanso,
si far la sai tal qu'elha fos grazia
per ma dompna que no me denh entendre.
E tenc me rics qu'althors no puesc atendre,
e platz m'i mais viure desesperatz
que si eu fos per altra domn' amatz.

II.

Viure m'es greu, e murir no-m sap bo.
Que farai doncx? Amarai m'enemia?
Amar la dei se non fas falhizo;
qu'Amors o vol qui m'a en sa bailia.
Al sieu voler no me vuelh ieu defendre,
ni enves lieis de nulha re contendre;
ans dei ben dir qu'ieu mi tenh per pagatz
pus que ieu fas totas sas voluntatz.

III.

Son vol fas ieu, e quer li-n guizado,
que, s'a lieis platz, desamat no-m aucia,
o que-m fezes oblidar sa faisso
que m'es miralhs en qualque loc qu'ieu sia;
e pus Amors me vol d'amar sorprendre
ben deuria a midons far aprendre
com ieu pogues de lieis esser privat ?
pueis m'auria mos mals guardonatz.

IV.

Trebails, maltraitz, cuida ab pensazo,
ni guerreyars qu'ieu fas no m'en desvia
de vos amar que-m tenetz en preizo.
Offensio no-us fis jorn de ma via
ni no ferai, com que m'en deia prendre;

ni no-m faretz ad outra dompna rendre;
que ab mon cor me sui ben acordatz
de vos amar sia sens o foldatz.

V.

E, non per so molt me sabria bo
si·n fezes sen; mas sitot fauc follia,
de tal foldat no vuelh qu?om m?ochaizo,
quar en amar non sec hom drecha via.
Qui gent no sap sen ab foldat despendre,
mas cel qu?o fai se pot ben tant estendre
qu?el er amicx sivals o drutz clamatz;
si·n aisso falh, non er adreit jutgatz.

VI.

A Mon Diable, qui belhs diz sap entendre,
t?en vai, chanso, e si te denh aprendre,
pueis poirai dir qu?eu sui ben cosselhatz
de Mon Cosselh, qu?es d?Aurenga laissatz.

- letto 695 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-269>